

CIVITAS BVRGENSIS



VRGOS, celebris admodum & antiquissima Galleciæ ciuitas, quam Burgensem nunc vocant, & Masburgi dictum fuisse quondam legimus. Quæ dicebatur & Auca, quod nomen mihi vero similis esse videtur, propterea quod etiam montes apud eandem urbem nunc Ocani dicuntur, & Aucani melius dicerentur. Tametsi Plinius non Aucam, sed Ceucam nominavit. Est autem Burgenfis ciuitas, ut diximus, antiquissima, multisque rebus insignis, & inter primarias vrbes totius Hispaniæ meritò referenda. Cuius incolæ non ociosi, non circumforanei sūt, sed omnes, non modò viri, sed etiam fœminæ labore manuum suarum victum quærunt, & honestissimè viuunt, & alij disciplinas liberales exercent. Mercatores, qui ciuitatem opulentam faciunt, fideles sunt & liberales. Sacerdotes diuini cultus, & rerum sacrarum studiosi, diuinis officijs & literarum studijs diligenter incumbunt. Magistratus, & Reipublicæ gubernatores, communibus commodis rectissimè prudentissimeque prospiciunt. Sic itaq; cunctis ciuitatis ordinibus officium suum liberè recteque facientibus, tota ciuitas indies augetur, indies magis illustratur. Equites, qui plures in ea sunt & potentes, immunitates, leges & priuilegia, quibus ciuitas gaudet, conseruare ac tueri diligentissimè student. Est præterea ciuitas magnis & pulchris, nec minus commodis ædificijs adornata, Foris venalibus, plateis, vicis, pontibus, templis, cœnobijs, amnibus exculta: cuius ecclesia maior, intus & extra, opere est & ædificio mirabilis. In qua res diuina sæpenuerò celebratur, cantoribus & organis, in quinque sacellis, inter se distantibus, nec alijs alios perturbantibus. Ex sacellis verò & sacrarijs, quæ multa sunt, illud vnum Castellæ Comestabilis conspicuum atque ditissimum, non Ecclesiæ solum Burgenfis, sed etiam cunctis ciuibus magno est ornamento. Sunt & extra urbem domus hospitales, quæ regiæ dicuntur, insignes & memorabiles, & maximi census. Quarum institutiones & ordines viuendi, qui sancti sunt, & maximè laudabiles, causa breuitatis omitto. Dicam tamen breuiter, de monasterio monialium, & sanctissima domo, quoniam res est insignis & memorabilis. Quam domum Huelgas vocant Hispani, cuius maxima sacerdos sub imperio suo diligentique custodia centum quinquaginta monialibus imperat, & sanctissimè consulit. Quæ quidem moniales sunt omnes equitum nobiliumq; principum filiæ, & familiæ generosæ. Præest etiam hæc sacerdos, quam Abadesam vocant, alijs septendecim monasterijs, & oppidis quatuordecim non ignobilibus, atque alijs minoribus quinquaginta. Confert præterea sacerdotia multa sacerdotibus, & census commendatarios viris XII. contribuit, & alia beneficia & officia & suis populis magistratus & gubernatores eligit. Aedificauit autem hanc domum & opus ingens Rex Sancius, qui propter opera, quæ fecit mirabilia, cognomen Amati promeruit. Est itaque hæc vrbs multis magnisque rebus memorabilis, cuius homines sunt humanissimi, & aduenas maximè diligunt. Sunt & fidelissimi suis principibus, & hospites patientissimè tolerant, & honorificentissimè tractant. Hæc ex Lucio Marineo Siculo excerptimus.

S. SEBASTIANI OPP.



Oppidum SANCTO SEBASTIANVM, quod patria lingua incolæ Donostien appellant, vnum est ex præcipuis oræ maritimæ oppidis regni Guipazcoæ, situm ad fluminis quoddam ostium, quod à veteribus Menlascum dicebatur, non procul ab ipsius oppidi opposita mari crepidine. Hæc autem Guipazcoa Hispaniæ regio, diuersa est ab ea, quæ Biscaia dicitur, quamuis vtriusque incolæ, & iisdem sint moribus, & eadem ferè pronuntiatione vtantur in eo idiomate, quod à reliquis Hispaniæ populis diuersum habent. hæc Florianus de campo. Oppidum hoc porrò amplissimo portu nobilitatur, in quo naues à sæuientibus vndis, & à partum propitijs ventorum flatibus, securam & tutissimam stationem habent, eò quod non industria arteque humana, sed sagacis naturæ prouidentia factus sit. Quam obrem multorum mercatorum Germanorum, potissimum verò Cantabrorum frequentatione celeberrimum est, qui varia genera mercium aduehant, & in alias mundi partes exportant. Archiepiscopatui Burgenfi obtemperat. Agrum habet frumenti, vini, & lanæ feracem. Progredientibus vltra Sancto Sebastianum ad milliaria Hispanica quatuor, occurrunt iuga montium Pyrenæorū, quæ iuga seu fastigia in illis locis hodie vernaçulo sermone appellantur, *Lasierra Lazquinez*.